



*Senin, 25 Desember 2023*  
**Ogen: Matius 1:22-23**



**"Immanuel"**



**I**mmanuel ertina Dibata ras kita. Adi Bage, kai nari man kebiarenta? Seh ka me kita ku bas perayan wari natal. Wari peringeten kerna ketubuhen Tuhanta Jesus Kristus. Wari natal e maba kerihen dengen kemalemen ate. I ja kita ngaloken dengen ngelakoken kiniersadan subuk i bas persadanta i tengah-tengah perpulungen bage pe persadanta i tengah-tengah jabu.

25 Desember menam kerina runggun ngerayakensa, kerina kalak Kristen er-wari natal, mperingeti ketubuhen Tuhanta Jesus Kristus. Tahun enda pe si persingeti ka, tandana kita anak-anak Dibata. Lit runggun si ngerayakenca alu erbahan perayan si luar biasa mewahna; lit ka nge runggun si ngerayakenca alu sederhana. Labo perayaan entah kai si man panganen si utama i bas wari natal e tapi ukur si ralo nandangi berita keselamatan e; ukur si nggit ngalemi kesalahen senina-turang bage pe kesalahen teman sada perpulungen.

Immanuel si ertina Tuhan ras kita; ertina maka biakNa si nggit ngalemi salah dengen nehken keleng ate jadi biakta. Adi Tuhan ras kita tentuna uga karakter Tuhanta e jadi karakterta ( menyatu ).

Tuhan ras kita ningen e, maka arus teridah arah kerina dampar geluhta; subuk arah pendahin (pendahin Tuhan si er-ratur), tutur bahasa (lemah-lembut - mpeturah ate malem), tingkah laku (mpesikap si man pesikapen; nehken pengalemi dosa; nehken keleng ate) ras pe nggit erkorban.

Pengarapenta maka, i bas wari natala tahun enda erti Immanuel e tuhu-tuhu tading bas dirinta bage pe biak kegeluhennta, rikut pe ras perayakenta maka si jadikan dirinta jadi tuah pasu-pasu nandangi jabuta, keluargata bage pe sekelewetta.

Babalah erti Immanuel e ku bas wari-wari siidalani kita.